

Meeqqanik inuusuttunillu ikiorsiisarneq pillugu Inatsisartut peqqussutaat nr. 1, 15. april 2003-meersoq Atuussimasoq (Historisk)

Suliassaqartitsiniarnermik inunnillu isumaginninnermik Kalaallit Nunaannut inatsit nr. 580, 29. november 1978-imeersumi § 2 naapertorlugu makku aalajangersarneqarput:

Siunertaq

§ 1. Peqqussummi matumani siunertarineqarpoq meeqqap qitiutinnissaa, aamma peqqussut naapertorlugu suliniutini tamani meeqqap pisariaqartitai aallaavigineqassasut.

Imm. 2. Inuit 18-iliinissamik tungaanut meeqqanik taagorneqarput, tamatumani allatut taaneqarsimanngikkunik.

§ 2. Kommunalbestyrelsi pisussaavoq meeqqat ineriartornerannik, ingerlalluarnerannik nammineersinnaanerannillu siuarsaasumik alliartrorneranni atugassaqartitsinissamik.

Imm. 2. Arnat naartusut meerartaassap peqqinnissaanik ineriartornissaanillu navianartorsiortritsinnaasumik atugaqartut siusissuklut tapersorsorneqarnissaat pingartinneqarpoq.

Imm. 3. Meeqqat timimikkut eqqarsartaatsimikkulluunniit piginnaanikillisimasut imaluunniit immikkut tapersorsorneqarnissamik pisariaqartitsisut siusissuklut aammalu siunertaqartumik iliuuseqarfigineqassapput.

§ 3. Naalakkersuisut pisussaaffigaat Meeqqat Pisinnaatitaaffii pillugit Naalagaaffiit Peqatigiit isumaqatigiissutaata atuutsinnissaa aammalu Naalagaaffiit Peqatigiit Meeqqanut komite-anut nunap iluani pissutsit pillugit danskit nalunaarusiaannut peqataassallutik.

Nakkutilliineq

§ 4. Meeqqat inuunermi atugarisaannik kommunalbestyrelsi nakkutilliissaaq. Nakkutilliineq eqeersimaartumik akuliunnikkullu ingerlanneqassaaq, taamaalilluni meeqqamik immikkut tapersorsorneqarnissamik pisariaqartitsisumik sapinngisamik siusinnerpaamik kommuni ilisimaarinnilerluni.

Imm. 2. Ilaqutariit meerartallit immikkut tapersorsorneqarnissamik pisariaqartitsisut kommunimut allamut nuuppata kommunip qimatap tapersorsorneqarnissamik pisariaqartitsineq kommunimut nuuffiusumut ilisimatitsissutigissavaa.

Nalunaartarneq

§ 5. Kinaluunniit meeqqamik peqqissutsimigut ineriartornermigulluunniit navianartorsiorrtinneqarluni

atugaqartinneqartumik paasisaqaruni kommunalbestyrelsimut nalunaaruteqarnissaminik pisussaaffeqarpoq.

Imm. 2. Inuit isumaginnittoqarfimmi, atuarfeqarfimmi imaluunniit peqqinnissaqarfimmi atorfeqartut meeqqamik ikiorneqarnissamik pisariaqartitsisumik paasisaqarunik kommunalbestyrelsimut nalunaaruteqarnissaminik sakkortunerusumik pisussaaffeqarput. Taamatutaaq inuit qinigaasimanertik tunngavigalugu suliaqartut nalunaaruteqarnissaminik sakkortunerusumik pisussaaffeqarput.

Imm. 3. Inuit nalunaaruteqarnissaminik sakkortunerusumik pisussaaffeqartut arnamik naartusumik annertuumik ajornartorsiuteqartumik tapersorsorneqarnissamik katsorsarneqarnissamillu pisariaqartitsisorinartumik paasisaqarunik kommunalbestyrelsimut nalunaassapput.

Misissuineq

§ 6. Kommunalborgstyrelsi meeqqamik immikkut tapersorsortarialimmik paasisaqaruni, ilan-ngullugu timikkut eqqarsartaatsikkullu pisinnaasakillissimaneq pissutigalugu, pissutsit misissorneqarnissaat kommunalborgstyrelsip isumagissavaa.

Imm. 2. Angajoqqaatut oqartussaassuseqartooq aammalu meeraq 15-ileereersimasooq akuersiseqqaarlugit misissuisoqassaaq.

Imm. 3. Meeqqap peqqissusaata ineriartorerataluunniit annertuumik ajoquserneqarnissaa navianartorsiornersooq paasiniallugu misissuinissaq pisariaqarpat angajoqqaatut oqartussaassuseqartooq meeraq 15-ileereersimasooq akuersiseqqaanngikkalluarlugit kommunalborgstyrelsip misissuinissaq aalajangiussinnaavaa.

Imm. 4. Misissuineq ingerlanneqassaaq najukkami suliamik ilinniagaqarsimasut isumaginnittoqarfimmeersut, peqqinnissaqarfimmeersut atuarfeqarfimmeersullu suleqatigalugit. Pisariaqarpat misissuisoqassaaq paaqqinniffimmiititsinermi imaluunniit napparsimavimmut unitsitsinikkut, ilanngullugu tarnikkut nappaatilinnut immikkoortooq.

§ 7. Misissuinermi paasisat isummertoqarnissaanut atorneqassapput, suliniutinik aallartitsinissaq tunngavissaqarnersooq taamaappallu suliniutit suut inassutigineqassanersut.

Imm. 2. Inassuteqarnermi ersersinneqassaaq angajoqqaatut oqartussaassuseqartooq aammalu meeraq suliniutissamut qanoq isumaqarnersut. Taamatutaaq ersersinneqassaaq ilaqutariinni taakkualu avatangiisaanni inuttut nukissat suut pigineqarnersut.

§ 8. Meeraq qulileereersooq pillugu suliami aalajangiisoqannginnerani ajornanngippat sapinngisamik meeraq oqaloqatigineqassaaq. Meeqqap isumai ilanngunneqassapput aammalu ukiuinut inerisimassusianullu naleqqiullugu naleqquttumik pingaartinneqassallutik.

Imm. 2. Meeqqanut quliliisimanngitsunut meeqqap inerisimassusiata suliallu suussusaata taamaattariaqartippagu meeqqap suliniutissamut qanoq isumaqarnera pillugu paasisutissat sapinngisamik pigineqassapput.

Imm. 3. Meeqqap angerlarsimaffiup avataanut inissinneqarnissaanik aalajangiisoqannginnerani suliaq kommunimi oqartussaasoqarfiit assigiinngitsunik suliallit ataatsimiititaanut oqaaseqarfigisassanngorlugu saqqummiunneqassaaq.

Suliniutit

§ 9. Angajoqqaatut oqartussaassuseqartoq aamma meeraq 15-ileereersimasoq akuersiseqqaarlugit ikiorsiissutissaq meeqqap immikkut pisariaqartitsineranut naleqqunnerpaaq kommunalbestyrelsip toqqassavaa.

Imm. 2. Kommunalbestyrelsi assersuutigalugu aalajangersinnaavoq

- 1) meeqqamut pissutsinut tunngatillugu isumaginninnermi sullissinikkut ikiorsiinissamik,
- 2) meeraq ulluunerani neqeroorutini, inuusuttut klubbianni, ilinniartitaanermut assigisaanniluunniit peqataassasoq,
- 3) illup iluani, perorsaaneramik imaluunniit allatut angerlarsimaffimmi tapersersuinikkut ikiorsiinissamik,
- 4) ilaqutariinnik katsorsaanisamik assigisaanilluunniit tapersersuinissamik,
- 5) meeqqamut, angajoqqaatut oqartussaassuseqartumut aamma ilaqutariinni ilaasunut allanut ulloq unnuarlu paaqqinniffimmi, angajoqqaarsiani assigisaanniluunniit ulloq unnuarlu inissiinissamik neqerooruteqarnissamik,
- 6) ulloq unnuarlu paaqqinniffimmi, angajoqqaarsiani assigisaanniluunniit oqilisaassinertut inissiinissamik neqerooruteqarnissamik,
- 7) meeqqap angerlarsimaffiup avataanut inissinneqarneranut atatillugu angajoqqaatut oqartussaassuseqartup tapersersorteqarnissaanik neqerooruteqarnissamik,
- 8) inuttut siunnersuisorisamik neqerooruteqarnissamik, tak. § 16,
- 9) ineqarfiutigalugu atuarfimiinnermut efterskole-miinnermulluunniit aningaasatigut ikiorsiinissamik, tamatumunnga angajoqqaatut oqartussaassuseqartoq nammineerluni akissaqanngippat,
- 10) meeqqap angerlarsimaffiup avataanut inissinneqarnissaanik, assersuutigalugu ulloq unnuarlu paaqqinniffimmut imaluunniit angajoqqaarsianut, meeqqap immikkut pisariaqartitsineranut naammassininnaasutut isigineqartumut imaluunniit,
- 11) suliniuteqareernerme malinnaanisamik.

Imm. 3. Kommunalbestyrelsi aalajangersinnaavoq suliniutit imm. 2-imi taakkartorneqartut malitsigisaannik aningaasartuutitut ikiorsiinissamik, taakkununga angajoqqaatut oqartussaassuseqartoq nammineerluni akissaqarsimanngippat.

Akuersisitseqqaarani angerlarsimaffiup avataanut inissiineq

§ 10. Angajoqqaatut oqartussaassuseqartup aammalu meeqqap 15-ileereersimasup akuersissutaa pigineqarpat pigineqanngikkaluarpalluunniit, meeqqap angerlarsimaffiup avataanut inissinneqarnissaa kommunalbestyrelsip aalajangiussinnaavaa, meeqqap peqqissusaata imaluunniit ineriartornerata ilungersunartumik ajoquserneqarsinnaanera qularnanngitsumik ulorianartorsiorpat pissutigalugu

- 1) meeqqap naammannngitsumik isumagineqarnera imaluunniit passunneqarnera,
- 2) persuttaaneq allatigulluunniit ilungersunartumik innarliineq,
- 3) atuiupilunermik ajornartorsiutit, pinerlunniartutut pissusilersornerit allatigulluunniit meeqqap inooqataanerani ajornakusoorutit annertuut,

4) meeqqap allatigut pissusilersornerani naleqqussarniarneraniluunniit ajornartorsiutit.

Imm. 2. Imm. 1 tunngavigalugu taamaallaat aalajangiisoqarsinnaavoq tunngavissalimmik ilimanaateqarpat ajornartorsiutit meeqqap angerlarsimaffimminiinnarnerani anigorneqarsinnaanngitsut.

§ 11. Kommunalbestyrelsi akuersitseqqaarani inissiinissamik aalajangiisinnaanngilaq, imaassimangippat meeraq aamma angajoqqaatut oqartussaassuseqartuq illersuisoqarsinnaatitaanerannik aamma inisiissamaarneq pillugu oqaaseqaateqartussaataitaanerannik naleqquttumik sivisussusilimmik piffissalerlugit paasitinneqarsimasut.

Imm. 2. Angajoqqaatut oqartussaassuseqartuq najugaa imaluunniit sumiiffia ilisimaneqan-ngippat, imm. 1 malillugu nalunaarut, meeqqamik isumaginnittuusumut tunniunneqassaaq.

Imm. 3. Illersuisoqarneq pillugu malittarisassanik, akissarsititsinissaq ilanngullugu, Naalackersuisut aalajangersaassapput.

§ 12. Akuersitseqqaarani inissiinissamik aalajangerneq sapinngisamik nalunaquttap akunneri 24-it qaangiutsinnagit angajoqqaatut oqartussaassuseqartumut ilisimatitsissutigineqassaaq.

§ 13. Angerlarsimaffiup avataanut inissiinissamik aalajangerneq ullut arfineq-pingasut qaangiutsinnagit Naalackersuisunut nalunaarutigineqassaaq.

Iliuusissanik pilersaarut

§ 14. Kommunalbestyrelsi § 9 aamma § 10 malillugit meeqqap angerlarsimaffiup avataanut inissinneqarnissaanik aalajangiitinnagu, iliuusissanik pilersaarussiaq suliarineqassaaq. Iliuusissanik pilersaarussiaq suliarineqarnissaa inissiinissami utaqqineqarsinnaanngippat inissiinermi siunertaasup naatsukullammik nalunaarutiginnissaa naammappoq. Tamatuma kingorna iliuusissanik pilersaarussiaq piaarnerpaamik kommunalbestyrelsip suliarissavaa, kingusinnerpaammik inisseereernermi ullut 14-nit qaangiutinnagit.

Imm. 2. Kommunalbestyrelsi naliliissaaq suliniutit allat ima annertutiginersut iliuusissanik pilersaarussiaq suliarineqartariaqarluni. Angajoqqaat imaluunniit meeraq iliuusissanik pilersaarummik kissaateqarpata, kommunalbestyrelsi pisussaavoq taamaattumik suliaqassalluni.

§ 15. Iliuusissanik pilersaarummi siunertaavoq siunertaqarluartumik meeqqamut suliniuteqarnissap qularnaarnissaa. Taamaattumik iliuusissanik pilersaarut meeqqamut ataatsimut tunngassaaq aamma suliniuteqarnermi siunertaq nalunaallisissallugu aammalu siunertap anguneqarnissaanut qanorpiaq suliniuteqartoqartariaqarnerneq nalunaassallugu. Iliuusissanik pilersaarummiissapput suliniuteqarnerup qanoq siviutiginissaa naatsorsuutigineqarnerneq, meeraq pillugu pissutsit immikkut ittut, ilanngullugit ilinniartitaaneq il. il.

Imm. 2. Angerlarsimaffiup avataanut inissiinermi aammattaq iliuusissanik pilersaarummiissaaq meeqqap angerlarsimaffiup avataani inissisimaneranut aammalu angerlaqqereerneranut atatillugu immikkut ilaqutariinnut tapersersuineq qanoq ilusilik pilersinneqassanersoq.

Imm. 3. Angerlarsimaffiup avataanut piffissami sivisunerusumi inissiinermi inissiinermut anguniakkatut iliuusissanik pilersaarutip nassuiaataa tunngavigalugu kommunalbestyrelsip

minnerpaamik ukiumut ataasiarluni inissiinissamik aalajangiineq naliliiffigeqqittassavaa. Inissiineq ingerlaannassasoq aalajangertoqarpat iliuusissamik pilersaarut nutaamik aalajangiinermut naleqquttunngorlugu iluarsineqassaaq.

Inuttut siunnersorti

§ 16. Inuttut siunnersortip nammineerluni attaveqarnermigut meeraq taassumalu ilaqtai siunnersuinikkut ilitsersuinikkullu tapersersussavai. Meeqqamut inuttut siunnersortissatut toqqarneqassapput inuit taamatut suliaqarnissamik immikkut piukkunnaateqartut.

Imm. 2. Inuttut siunnersorti kommunalbestyrelsimit toqqarneqassaaq peqatigisaanillu iliuusissamik pilersaarusiaq suliniuteqarnissamik nassuiaasoq allaganngorlugu tunniunneqassaaq.

Imm. 3. Inuttut siunnersortinik toqqaasarnermut akissarsisitsisarnermullu malittarisassamik kiisalu inuttut siunnersortitut sulinerup qanoq ingerlanneqarnissaanut malittarisassamik Naalackersuisut aalajangersaassapput.

Paarsinissamik akuersissut

§ 17. Kinaluunniit meeqqamik ilaqtariinni paarisassamik tiguisinnaanngilaq kommuni ilaqtariit paarsisussat najugarivitaat tamatumunnga allaganngorlugu akuersissuteqaqqaartinnagu.

Imm. 2. Paarsinissamik akuersissummik qinnuteqartoqarnerani qinnuteqartoq taassumalu aappaa inooqataaluunniit pinerluuteqarsimanermut nalunaarsuiffimmit takussutissiamik takutitsissaaq. Ilaqtariit paarsisussat angerlarsimaffianni pissutsit perorsaanissamut aamma peqqinnissamut tungatillugu isumannaatsuunersut kommunalbestyrelsi naliliissaaq.

Imm. 3. Meeqqanut ataasiakkaanut ilaqtariinni paarineqartussanut tamanut paarsinissamik akuersissut allaganngorlugu tunniunneqassaaq. Meeqqat paarineqartussat qassit ilaqtariinni paarsisussani isumagineqarsinnaanersut kommunalbestyrelsi ataasiakkaani tamani aalajangiissaaq.

Imm. 4. Akuersinermi tungaviusut tungavissaajunnaarpata paarsinissamik akuersissut atorunnaarsinneqassaaq.

Imm. 5. Ilaqtariinnik paarsisussamik akuerinnitarneq pillugu aalajangersakkanik erseqqinnerusunik Naalackersuisut aalajangersaassapput.

Kommunalbestyrelsimit ilaqtariinnut inissiineq

§ 18. Ilaqtariit inuussutissarsiutigalugu paarsisartut tassaapput ilaqtariit paarsisartut, meeqqanut annertuumik eqqarsartaatsimikkut ajoquserneqarsimasunut imaluunniit meeqqanut annertuumik timimikkut eqqarsartaatsimikkulluunniit innarluutilinnut isumaginninnissamut immikkut tungavissiisumik isumaginninnikkut sullissinissamut ilinniakkamik tunuliaqutallit assigisaanilluunniit inuussutissarsiormi misilittagallit.

Imm. 2. Angajoqqaarsiat minnerpaamik aappaata meeqqamik ataatsimik arlalinnilluunniit angerlarsimaffimmi paarsineq ulloq tamaat suliffigissavaa.

Imm. 3. Ilaqutariinni inuussutissarsiutigalugu paarsisartuni angajoqqaarsiat tamarmik angerlarsimaffiup avataani inuussutissarsiutigalugu suliffeqarnissaat immikkut illuinnartunik pisoqartillugu kommunalbestyrelsi akuerisinnaavaa.

§ 19. Ilaqutariit nalinginnaasumik paarsisartut tassaapput ilaqutariit angerlarsimaffiminni meeqqanik paarsisartut.

Imm. 2. Ilaqutariit paarsisartut paarsinissamik suliassaq nalinginnaasumik ulloq tamaat suliffingngilaat angerlarsimaffiullu avataani inuussutissarsiutigalugu suliffeqarsinnaallutik.

Nammineq aaqqissuutamik ilaqutariinnut inissiineq

§ 20. Meeqqamut angajoqqaatut oqartussaasuseqartup nammineerluni ilaqutariinnut isumaqatiginnissinnaavoq meeraq imminniitillugulu isumagisarissagaat.

Imm. 2. Meeqqamik inissiisoq inissiinermulluunniit peqataasoq pisussaavoq angajoqqaarsiat atuuttumik paarsinissamik akuersissummik peqarnersut qularnaassallugu. Paarsinissamik akuersissummik tunineqartup piaartumik kommunalbestyrelsi nalunaarfigissavaa, meeraq tiguneqarpat, paarsineq taamaatippat allanngorpalluunniit aammalu ineqarnermut tunngasunik allanngortoqarpat.

Imm. 3. Meeraq nammineq aaqqissuutamik ilaqutariinnut inissinneqarpat angajoqqaatut oqartussaasuseqartup meeqqap pilersorneqarnera tamakkiisumik nammineerluni isumagissavaa.

Kommunalbestyrelsip ilaqutariinnut inissiiviusunut pisussaaffii

§ 21. Ilaqutariit paarsisussat paarsinermi suliassamik sukumiisumik ilitsersorneqartussaapput. Ilaqutariit inuussutissarsiutigalugu aamma nalinginnaasumik paarsisussat angerlarsimaffiup avataanut inissiinermi iliuusissanik pilersaarummik tunngaviusumik peqassapput. Taamatullu sulinermi atugassarititaasut akiliuteqarnissarlu pillugit ilaqutariit paarsisussat kommunalbestyrelsip isumaqatigiissusiorfigissallugit. Ilaqutariit paarsisussat pikkorissarnissamik ingerlaavartumillu nukittorsarneqarnissamik neqeroorfigineqarsinnaapput.

Imm. 2. Ilaqutariit paarsisussat sulineranni pissutsit, aningaasarsiaqarnerat paaqqinninersiuteqarnerallu pillugit Naalakkersuisut aalajangersaassapput.

Ulloq unnuarlu paaqqinniffiit

§ 22. Meeqqanut angerlarsimaffiup avataanut inissinneqartussanut pisariaqartunik amerlassusilinnik paaqqinniffinni inissaqartitsinissaq Naalakkersuisut nakkutigissavaat.

Imm. 2. Paaqqinniffiit imm. 1-imi pineqartut pilersinneqarnerini ingerlanneqarnerinilu Naalakkersuisut ataqatigiissaarissapput, aammalu perorsaanermt tunngatillugu ilitsersuissallutik.

Imm. 3. Nuna tamakkerlugu paaqqinniffinni aqutsineq Naalakkersuisut isumagissavaat.

Imm. 4. Paaqqinniffiit pilersinneqarsinnaallutillu ingerlanneqarsinnaapput Naalakkersuisunit, kommunimit ataatsimit arlalinnilluunniit imaluunniit Naalakkersuisut isumaqatigiissuteqarfignissaannit paaqqinniffittut imminut pigisutut.

§ 23. Ulloq unnuarlu paaqqinniffiit pilersinneqarnissaannut, pisatsersornissaannut, siulersorneqarnissaannut ingerlanneqarnissaannullu aammalu paaqqinniffinni perorsaanermik suliaqarnermut malittarisassanik pisariaqarfiisigut Naalakkersuisut aalajangersaassapput.

Imm. 2. Ingerlatsinerup tungaatigut, aningaasaqarnermut perorsaanermullu tunngatillugu ulloq unnuarlu paaqqinniffinnik Naalakkersuisut nakkutilliissapput.

§ 24. Ulloq unnuarlu paaqqinniffiit inatsisartut peqqussutaanni matumani pineqartut, meeq-qanik paaqqinniffimmut kommunalbestyrelsemit inissikkumaneqartunik tigusinissaminnik pisussaapput, tamatumuuna inissaqartitsigunik aammalu inissiinissaq paaqqinniffiup siunertaanut naapertuuppat. Inissiinissaq pillugu kommuni paaqqinniffillu isumaqatigiinngissuteqarpata, apeqqut Naalakkersuisunut aalajangiiffigisassanngorlugu saqqummiunneqassaaq.

Imm. 2. Ulloq unnuarlu paaqqinniffiup kommunalbestyrelsimik suleqateqarluni isumaginninnermi perorsaanermut tunngasunik allanik suliaqarsinnaanera pillugu Naalakkersuisut aalajangersaasinnaapput, tamatumani ilanngullugu akiliuteqarnissamik aalajangersakkat.

§ 25. Meeqqanut ulloq unnuarlu paaqqinniffinnut inissinneqarsimasunut kommunip akiliutissaa ulloq unnuarlu inissisimaffimmut ataatsimut aningaasanngorlugu naatsorsorneqassaaq.

§ 26. Ulloq unnuarlu paaqqinniffiit ukiumoortumik Naalakkersuisunut nalunaaruteqartassapput. Kingusinnerpaamik Inatsisartut upernaakkut ataatsimiinneranni Naalakkersuisut ataatsimoortitamik ukiumoortumik Inatsisartunut nalunaaruteqartassapput.

Imm. 2. Ulloq unnuarlu paaqqinniffiit ukiumoortumik nalunaarusiaasa tunniunneqarnissaat, ilusissaa imarisassai il.il. pillugit malittarisassanik erseqqinnerusunik Naalakkersuisut aalajangersaassapput.

Suliniutinik atorunnaarsitsineq

§ 27. § 9 aamma § 10 naapertorlugit suliniutit unissapput suliniuteqarnermi siunertaq anguneqarpat, ilanngullugit iliuuseqarnissamik pilersaarummi anguniakkat anguneqarpata, imaluunniit suliniuteqarneq siunertaminik naammassinnikkunnaarpat.

Imm. 2. Inatsisartut peqqussutaat manna naapertorlugu suliniutit aamma unissapput meeqqap 18-iliinerani. Suliniutit ingerlareersut 18-ileereernermi ingerlaannarsinnaapput, inuusuttoq tamatumunnga akuersippat aammalu iliuuseqarnissamik pilersaarummi anguniakkat aalajangiunneqarsimasut anguneqarnissaat naleqquttumik ilimanaateqarpat.

Imm. 3. Imm. 2 malillugu suliniuteqarneq unippat, kommunalbestyrelsip inuusuttoq suleqatigalugu aammalu kingusinnerpaamik angerlarsimaffiup avataanut inissiinerup taamaatinnissaa qaammatinik arfinilinnik sioqqullugu, nassuiassavaa tamatuma kingorna inuusuttoq qanoq tapersorsorneqassanersoq.

§ 28. Ilaqutariinni inissiinerup taamaatinnissaa aalajangiunneqartinnagu, ilaqutariit paarsisut oqaaseqartinneqassapput. Meeraq kommunerivitami avataani ilaqutariinnut inissinneqarsimappat, meeqqap kommuni uninngavigisaa oqaaseqartineqassaaq.

Imm. 2. Ulloq unnuarlu paaqqinniffimmiigunnaarnissamik aalajangiisoqartinnagu ulloq unnuarlu paaqqinniffik oqaaseqartinneqassaaq.

Imm. 3. Ulloq unnuarlu paaqqinniffimmit imaluunniit ilaqutariinnit inuussutissarsiutigalugu

paarsisartunit oqaaseqaateqarnermi kommunalbestyrelsip aalajangiunniagaa assortorneqarpat, suliaq § 34 malillugu Meeqqat pillugit paasisimasalittut qitiusumik ataatsimiititamut oqaaseqarfigisassanngortinneqassaaq.

§ 29. Angerlarsimaffiup avataanut inissiineq unissanngitsoq kommunalbestyrelsi aalajangiisinnaavoq tamanna meeqqap pisariaqartitaanut akerliuppat. Tamatuminnga naliliinermi pi-ngaartinneqassaaq inissiinerup nalaani meeqqap ikiorserneqarnissamik periarfissai tamakkiisumik atorluarneqarnersut. Tamanna aamma atuuppoq angajoqqaatut oqartussaassuseqartoq akuersiseqqaarlugu meeraq angerlarsimaffiup avataanut inissinneqarsimappat.

§ 30. Angerlarsimaffiup avataanut inissiinerup taamaatinnissaanik aalajangerneq Naalakkersuisunut nalunaarutigineqassaaq ullut arfineq-pingasut qaangiutsinnagit.

Inissiinermi

§ 31. Kommunalborgstyrelsip inissinneqarfissaaq aalajangigassaraa aammalu meeqqap paarineqarnera, perorsarneqarnera ilinniartitaaneralu isumagissallugu kiisalu allatigut meeqqamut namminermut tunngasut pisariaqarfiisigut aalajangiiffigissalugit.

Imm. 2. Kalaallit Nunaanni inissiinissamik periarfissaarussimappat Naalakkersuisut akuersinerisigut Kalaallit Nunaata avataanut inissiisoqarsinnaavoq.

§ 32. Inissiinerup atuunnerani kommunalborgstyrelsip inissiivimmik attaveqarnermigut meeqqamut tunngassuteqartut malinnaavigissavai aammalu inissiiviup, katsorsaanerup assigisaasaluunniit allannornissaa pisariaqarpat aalajangiissalluni.

Imm. 2. Inummik, paaqqinniffimmik imaluunniit peqatigiiffimmik akuerisaasimasumik § 36 malillugu meeqqamik ulluinnarni isumaginninnissamik kommunalborgstyrelsi piginnaatitsinnaavoq. Meeraq ulloq unnuarlu paaqqinniffimmut inissinneqarsimappat pisortaasoq ulluinnarni isumaginnittuussaaq.

§ 33. Meeqqap angajoqqaallu akornanni attaveqatigiittuarnissaaq meeqqamut ulluinnarni isumaginnittoq suleqatigalugu kommunalborgstyrelsip isumagissavaa. Angerlarsimaffimmut utertitsinissap aqutissiuunnissaa sulissutigineqassaaq, tamanna meeqqap ineriartornerata ingerlaannarnissaanut peqqinnissaanullu akerliunngippat.

Meeqqat pillugit paasisimasalittut qitiusumik ataatsimiititaq

§ 34. Meeqqat pillugit paasisimasalittut qitiusumik ataatsimiititami ilaasortaapput inatsisileritooq, tarnip pissusiinik ilisimasalik, isumaginninnermi siunnersorti, isumaginninnermi perorsaasoq, ilinniartitsisoq aamma meeqqerisoq, tamarmik meeqqat inuusuttullu pisariaqartitaannik immikkut ittumik ilisimasaqartussat.

Imm. 2. Ataatsimiititaq ukiunut sisamakkaartunut Naalakkersuisut pilersissavaat, siullermik peqqussutip matuma atuutilerneranit aallartittumik. Ilaasortaqaq ataatsimiititap piffissaaq atuuffissaata ingerlanerani soraarpat, ilaasortassamik nutaamik ataatsimiititap piffissaaq atuuffissaata sinneranut atuuttussamik Naalakkersuisut toqqaassapput.

Imm. 3 Ataatsimiititaq iluminni siulittaasumik siulittaasumullu tullersortimik toqqaalluni nammineq inissitsitissaaq.

Imm. 4. Ataatsimiititap suliassaraa meeqqap ulloq unnuarlu paaqqinniffimmit aamma ilaqtariinnik inuussutissarsiutigalugu paarsisartunit angerlartinneqarneranut atatillugu § 28, imm. 3 naapertorlugu suliani oqaaseqaateqarnissaq.

Imm. 5 Naalackersuisut ataatsimiititap suleriaasissaa suliarissavaat, allattoqarfeqarneq isumagissallugu aammalu aningaasartuutit ataatsimiititap ataatsimiinneranut tunngasuteqartut aningaasartuutigissallugit.

Suliniutit allat - misileraanerit

§ 35. Kommunalbestyrelsip qinnuteqarneratigut suliniutinik allaanerusunik pilersitsinissaq Naalackersuisut akuerisinnaavaat, ilanngullugit misileraanerit aammalu meeqqanut inuusuttunullu isumaginninnikkut perorsaanerimi neqeroorutit immikkut ittut.

Imm. 2. Suliniutit imm. 1-imi taaneqartut Naalackersuisut nakkutigissavaat.

Peqatigiiffinnik akuerinninneq

§ 36. Meeqqanut inuusuttunullu sullissinerup iluani atugassarititaasussatut erseqqinnerusumik aalajangersakkat malillugit peqatigiiffiit suliffimmik ingerlatsinissaat Naalackersuisut akuerisinnaavaat.

Aningaasalersuineq

§ 37. Inatsisartut peqqussutaat manna malillugu meeqqanut inuusuttunullu ikiorsiinissamut aningaasartuutit kommuninit aningaasartuutigineqassapput.

Imm. 2. § 11 malillugu illersuisoqarnermut aningaasartuutit Nunatta Karsianit aningaasartuutigineqassapput.

Imm. 3. Paaqqinnittarfiit sananerinut ingerlatinnerinullu aningaasartuutinut Naalackersuisut tapiissuteqarsinnaapput.

Angajoqqaat akiliuteqarnerat

§ 38. Kommunalbestyrelsip meeraq angerlarsimaffiup avataanut inissikkuniuk inissiinermi kommunip aningaasartuutai angajoqqaanut tamakkiisumik ilaannakortumilluunniit akiligassanngortissavai.

Imm. 2. Pissutsit taamaattariaqartippassuk, kommunalbestyrelsip angajoqqaat akiliisinngitsoorsinnaavai imaluunniit akiligassaat isumakkeerinnissutigisinnaallugit.

Imm. 3. Angajoqqaat aningaasaqarnikkut atugarisaat annertuumik allanngorsimappata kommunalbestyrelsip akiliinissamik aalajangiineq allanngortissinnaavaa.

Imm. 4. Angajoqqaat akiliutissaasa amerlassusissaat pillugit Naalackersuisut aalajangersaassapput.

Naammagittaalliuuteqarneq

§ 39. § 6, imm. 3, §§ 9-10, § 17, § 29 aamma § 38 malillugit aalajangiinerit isumaginnittoqarfiup aqunneqarnera aaqqissuussaanelu pillugit Inatsisartut peqqussutaanni aalajangersakkat tunngavigalugit Isumaginninnermut Naammagittaalliuuteqartarfimmut naammagittaalliuutigineqarsinnaapput.

Pineqaatissiinissamik aalajangersakkat

§ 40. Kinaluunniit inatsisartut peqqussutaata matuma atortinneqarnerani peqataasoq pisortanik sullissitilluni suliffeqartilluniluunniit pinerluttulerinermi inatsimmi pinerluutit pillugit malittarisassat malillugit akisussaaffeqarpoq suliffik qinigaanikkut pigaluarpalluunniit.

Atortuulersitsineq ikaarsaariarnermilu aalajangersakkat

§ 41. Inatsisartut peqqussutaat manna atortuulerpoq ulloq 1. juli 2003.

Imm. 2. Peqatigisaanik Inatsisartut peqqussutaat nr. 9, 30. oktober 1992-imeersoq atorunnaarpoq.

Imm. 3. Maleruagassat Inatsisartut peqqussutaat nr. 9, 30. oktober 1992-imeersoq tunngavigalugu aalajangersarneqarsimasut atuutiinnassapput, Inatsisartut peqqussutaat manna imaluunniit Inatsisartut peqqussutaat allat tunngavigalugit maleruagassanik aalajangersaanikkut taarserneqarnissaasa imaluunniit atorunnaarsinneqarnissaasa tungaanut.

Namminersornerullutik Oqartussat, ulloq 15. april 2003

Hans Enoksen

/

Ruth Heilmann